



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tiryimym@aolima tir yimym TAPAK 8

Küm ana tsüngda India nung Maoists samatsütsü: Amit Shah

Taruba asaya nung Lewandowski masayatetsü akok

VOL. XX NO. 356 (ADOK 356) DIMAPUR KÜPTOKNÜ (SATURDAY) MONGPUTENI (OCTOBER) 07, 2023 ₹ 5.00

## Sikkim nung nisung 40 asü; 103 mangur

**Gangtok, October 6, 2023 (TYO):** Sikkim tzumetsung lendong nung tasur ajak agi nisung 40 kumogo aser ano 103 samar bushiteper.

North Sikkim nung nung tzunglu kanga aruba ajanga Lhonak Lake nung tzu mesemi yimokba ajanga Lachen Valley nung aliba Teesta River nung tzumetsung timtem adok.

Army aser NDRF teloktemi Teesta river basin aser north Bengal nung anogo ananu tashi nisungtem bushitepogo.

Tang tashi nung Sikkim tzumetsung lendong nung nisung 103 samar bushiteper. Külen, Dikchu, Singtam aser Rangpo jilatem tzu agi metsubanga lir.

Sikkim kubok tesem balala nung tourists 3,000 shi anendaka lir. Tang tashi nung nisung 2,011 kumzükogo aser tzumetsung ajanga nisung 22,034 dak kongshia lir ta Sikkim State Disaster Management Authority (SSDMA)-i metetdaksü.

Ts ü n g s a n g - m o p u n g majungba ajanga Sikkim state education department-i October 15 tashi school, college aser university ajak shibangtsü

tetuyuba agütsüogo. Hokolbarnü Sikkim Chief Minister Prem Singh Tamang-i tzumetsung lendong nung asur kibong shia nem Rs 4 lakh teyari agütsütsü osang metetdaksüogo. Maneni pei talidak toktsür tangalen jenoka alir shia nem Rs. 2,000 immediate relief agütsüogo.

Külen, Centre sorkari Sikkim nem Rs 44.8 crore relief package agütsütsü mulunga agizükogo.

Sikkim nung tzumetsung agi kongshia alirtem yaritsü atema Union home minister Amit Shah-i Rs 44.8 crore agütsütsü mulunga agizük.

Senji Sikkim State Disaster Response Fund (SDRF) nem central share jelia agütsür ama asütsü.

Centre-isa tzumetsung ajanga takoksa bentsür aruba asadangtsü atema Inter-Ministerial Central Team (IMCT) ka tentetogo.

“IMCT-i asadangtetba nung ajemdaker National Disaster Response Fund (NDRF) nungi central assistance talila agütsütsü” ta Ministry of Home Affairs (MHA)-i metetdaksü.

## Nagaland nungi kaketshirtemi Tir Murmu den ajuruteper



October 6, 2023 nü Rashtrapati Bhavan nung Nagaland nungi kaketshirtemi Tir Droupadi Murmu nem sempet ka agütsüdang agiba noksa angur.

**Dimapur, October 6, 2023 (TYO):** Nagaland nungi kaketshirtemi October 6, 2023 nü India Tir Droupadi Murmu den ajurutepogo.

Kohima district kubok Kigwema, Kezo aser Chakabama yimtsungtem nungi kaketshirtem National Integration Tour (NIT) oa lir aser parnoki Rashtrapati Bhavan nung Tir Murmu den ajurutepa liasü.

Tanü Tir Murmu-i kaketshirtem pelashishia agizük aser parnok dang meranga shisaliok angazüktsü aser alizung atongtsü ayongzük.

Kaketshirtemi loktiliba aser linük tajungba akümtsüba

maparen nung shilem agitsü laisa ayongzük.

Iba mapang Nagaland nungi kaketshirtemi Naga sobaliba sayuba noksa ka Tir Murmu nem sempet agütsü.

Anogo 14 nü NIT ya Indian Army indang Spear Corps ajanga ketdangtsüa agir. September 27, 2023 nü Rangapahar Military Station nungi General Officer Commanding, Spear Corps Lt Gen HS Sahi, AVSM, YSM, SM-i iba sentong tenzükja liasü.

NIT teloki Bareilly, Ranikhet, Nainital, Dehradun aser Mussoorie semdangba sülen tanü New Delhi tongogo. Iba tour nung of Uttarakhand aser

National Capital Region (NCR) semdanga senzür aser kaketshirtemisa Dehradun nung Indian Military Academy (IMA) aser Rashtriya Indian Military College (RIMC) semdangogo.

Parnoki Ranikhet nunga Kumaon & Naga Regiment training aser passing out parade repranga liasü.

Nagaland nungi kaketshirtemi Dehradun nungi New Delhi tashi Vande Bharat Express nung aru.

Iba National Integration Tour (NIT) nung tetsür 7 aser tebur 12 den tesayur ana dena lir ta PRO & Spokesperson, Ministry of Defence, Manipur, Nagaland & Southern Arunachal Pradesh-i sangdong ka nung ashi.

## BAN-i Ministry of MSME den yaritepa VDP ayongzük



**Dimapur, October 6, 2023 (TYO):** Business Association of Nagas (BAN)-i Ministry of MSME Development aser Facilitation Office, Dimapur den yaritepa local entrepreneurs atema sentong ka agiogo.

October 6, 2023 nü Hotel Lake Shilloi Dimapur nung agiba Vendor Development Program (VDP) nung shishilembar aser entrepreneurs aika aden aser parnoki Central Public Sector Undertakings (CPSUs) aser tanga Central Government Organizations den shishilembatsü tangazükba jenti nguogo.

Iba sentong nung adenertem dang Public Procurement Policy for Micro and Small Enterprises (MSEs) Order, 2012 indang osang tejangja metetdaksü. Iba policy ajanga Central Government Agency shiai küm shia medium aser small enterprises nungi 20% alizüktsü aser iba nung SC/ST entrepreneurs nungi 4% dena lir.

MSME Development & Facilitation Office nung Assistant Director (Mech) A. Selwin Samraj-i Government E-Marketplace (GeM) amala online

procurement portals indang osang lemsatöp.

Maneni CPSUs aser Central Government Organizations nungi teshimtet nübotemi Public Procurement Policy nung ajangshia arubatem lemsatöpa liasü.

Sentong nunga MSME Development & Facilitation Office nung Joint Director & HOO Taliwati Longchar, IEDS-i Naga entrepreneurs dang Public Procurement Policy meteta alitsü ayongzük.

Iba sentong nung Power Grid Corporation of India Limited, Food Corporation of India, National Institute of Technology, Nagaland, three battalions of Central Reserve Police Force, Airports Authority of India, CGST Commissionerate aser Indian Council of Agricultural Research dena government agencies aika aden.

BAN-i Nagaland nung entrepreneurship aser rongsenketzung renlokdaaksütsü atema tenangzükba agir inyaka aruba nung Vendor Development Program ya ka lir ta Executive Director, BAN Jason Sanglir-i sangdong ka nung metetdaksü.

## United Nations Human Rights-i Meitei teloktem aitsür

**Imphal, October 6, 2023 (Agencies):** Manipur nung activist Babloo Loitongbam'er ki amakba atema United Nations Human Rights-i tebilemtsü abenba osang lemsatöpogo.

UN Human Rights-i Meitei Leepun aser Aarambai Tengol dak tai tongloksür.

“Manipur nung May ita nungi kin o kin rara indang jembiba atema Meitei Leepun aser Aarambai Tengol teloktemi human rights defender Babloo Loitongbam amokmerenba atema aoksar. Onoki ketdangtsürtemi pa, par kibong aser ki kumzükba ayutsü aser aibelenertem merenshitsü ayongzük” ta parnoki sangdong ka nung metetdaksü.

October 5, 2023 nü mejangja nisung kari Imphal West district nung Human Rights Alert director Babloo Loitongbam'er ki amakba aser ki osettem raksatsüba sülen UN Human Rights-i iba osang sangoktsü.

Osang angazükba agi yasung 6:30 ako meta nisung 30-40 shi ka par kidangi aru aser gari ka den ki osettem raksatsü.

Iba mapang Loitongbam'er kiyongertemi mejangjaba

nisungtem noktangtsü merang saka makok.

Lendong atalokba osang angashir Lamphel Police Station aser Imphal West district Police nungi police telok ka Loitangbam'er ki tonga ao.

Manipur nung kin o kin rara atema Loitangbam-i ola adoka arur aser pai tali bilemloka oa inyakba teloktem aser Chief Minister N. Biren Singh lenisüba nung ashishiteper.

Imphal aser New Delhi nung BJP-i aniba “double engine government” nungi ola kecha maliba atema Loitangbam-i süngmangba lemsatöp aser sorkari ang mulung asübo iba tensa ya tamajungba kuma maodang anener lila ta pai ashi.

“India sorkari ghonda masü saka anogo ananu nung iba tensa azüoktetsü tashi lir. Parnoki China, Pakistan anema rarater saka prangpong abenba lanur kar aser mashii inyaksangshiba telok kar mazüokteter” ta activist Babloo Loitongbam-i ashi.

Imphal Valley nung tenla ki ka danga noktaka mali, ajak raksatsüogo ta paisa metetdaksa liasü.

Loitangbam-i Meitei Leepun aser Aarambai Tengol teloktem anema jembia arur. Meitei nung telok ana yagi Kuku nung dak mapa tamajung inyakba atema tai tongloksü lir.

Telok ana yagi nübertem mulungjang nung telungur mapa inyaksü tangatöpa agütsür ta paisa ashi.

“Meitei Leepun aser Aarambai Tengol teloktem ya Rashtriya Swayamsevak Sangh (RSS) den mesüktepa lir aser Manipur lendenlen tenla ki ka danga mali. Tenla ki ajak samatsüogo” ta Loitangbam-isa metetdaksü.

May 3, 2023 nü Manipur nung tensa mejungi akümba sülen nungi Loitangbam-i Chief Minister N. Biren Singh mapa nungi anentsü takhangba agüja arur.

Meitei Leepun-i taoba Additional Superintendent of Police Thounaojam Brinda mokdangba metetdaksüogo.

Meitei Leepun aser Aarambai Tengol ajanga mi senoktsü ta Brinda-i shia liasü saka tatsüka lir lai social media video ka ajanga iba tai osang lemsatöp ta jangjashitsü.

# KAYAKKALP sempet angurtem tushia amshi



**Dimapur, Mongputeni/Oct. 06 (TYO):** 2021-2022 aser atema KAYAKKALP sempet angurtem nem tenüngsang agütsüba sentong ka Health and Family Welfare Directorate indang Conference Hall,

Kohima nung Hokulbarnü agia liasü, kong Minister, Health & Family Welfare, P. Paiwang Konyak tesemdanger tongti ama dena iba sentong moatsü. Minister Paiwang-i KAYAKKALP ajanga tajanzük anguba indang rateta ashi, koba

Government of India ajanga National Health Mission kübok tenzüka liasü. Mozüki nung tatishitsü tajung lia mapa inyaker jangjateta teyari agütsüsü nükjidong nung iba sentong ya tenzü. Doctor aser nurse tem ya

temeshi amai repranger aser aiben tanabuba tsüngrem aser kotak tenyar ama züngshir, ta Minister Paiwang-i ashi.

Pai healthcare sector nung alir ajunga dang nüburtem bendanga agütsür tenzüksü ajungshia liasü.

KAYAKKALP Program ya mürekmejuba, tajungba nung anepaluba, mozüki nung tashidak menatepba aziüoktsü yimyatem amshiba nung rangloka lir. Nagaland nung iba sentong 2015-16 nungi amshi tenzüka sülen health unit inyakyim nung nüburtem shilem agütsü ajungmesoa arur, kong nüburtemi health facilities tajungba kumdaktsüsü mechi mapang aser rongsen indoker.

Iba sentong nung tetushi agütsüba health unit 163 nem Minister Paiwang-i tenüngsang agüja liasü.

Pai ano healthcare professionals aser nüburtem dang maneni lungjemer public health services asoshi anibelem mesasai inyaktsü ayongzüka liasü.

Sempet angur 163 rongnung DH category nung KAYAKKALP Award for FY 2021-2022 ya Dimapur nem agütsü, Tuensang tanabuba aser Kiphire tasembuba jenjang angu.

CHC category nung Changtongya aser Aboi ya mezüng asen tanabuba jenjang ngutet.

PHCs tem rongnung Kuhuboto, Chunlikha, Sitimi, Longkhim, Phomching, Athibung, Chetheba, Chare, Chukitong, aser Suruhoto nung temi sempet agizüka liasü.

HWC category nung

Longkong, Mhaninamtsi, Sekruzu, Pongidong, Naga United, Singapore, aser Tangha nem Best Health and Wellness Centers sempet agüja liasü.

Best Eco-Friendly Award ya IMDH Mokokchung nem agütsü.

2022-2023 atema Tuensang Civil Hospital nem Best DH Award agütsü, Aboi nem Best CHC sempet agütsü aser Pherima, Chunlikha, Likhimro, Chuchuyimlang, Changlangshu, Tenning, Ruzazho, Chessore, Nyiro, aser Akuluto nung nem PHC sempet agüja liasü.

Ano maneni Mopungchuket, Bongkolong, Sekruzu, Changsu, Diphupar-B, Kisetong, Pongo, New Chingmei, Rusoma, Chishilimi, aser Aopao nema PHC sempet agüja liasü.

Tuensang Civil Hospital-isa Best Eco-Friendly DH sempet angu aser ano mozüki, CHCs, PHCs aser HWC-SC balala nem sempet agüja liasü.

Iba sentong nung menden Dr. E. Motsuthung Patton, Director of the Department of Health and Family Welfare liasü aser Dr. Ritual Thurr-i tarur pela agizükba o jembia liasü.

Dr. Manyu Phom ajanga iba sentong ayongzüka nükjidong rateta ashi aser V. Kezo, Commissioner and Secretary, H&FW ajanga o tatsüka jembia liasü.

Dr. Tetseo, Director, Dental HFW ajanga melepzüng o jembia liasü.

Sentong metenzük dang Minister P. Paiwang Konyak-i Drugs Control Administration and Nagaland Drug Laboratory indang administrative office tasenba semzüka liasü.

## Ngwalwa yimdak scientific beekeeping training agütsü



All India Co-ordinated Research Project on Honey bees and Pollinators, [ICAR - AICRP (HB&P)], School of Agricultural Sciences (SAS), Nagaland University, Medziphema ajanga October 6, 2023 nü Panchayat Hall, Ngwalwa Village nung "Scientific Meliponiculture and Apiculture for better Honey production & Pollination" indang training agütsüdang tangokba noksa ka yangi angur.

**Dimapur, Mongputeni/Oct. 06 (TYO):** All India Co-ordinated Research Project on Honey bees and Pollinators, [ICAR - AICRP (HB&P)], School of Agricultural Sciences (SAS), Nagaland University, Medziphema ajanga October 6, 2023 nü Panchayat Hall, Ngwalwa Village nung "Scientific Meliponiculture and Apiculture for better Honey production & Pollination" indang training ka agüja liasü.

Iba sentong ya Dr. Avinash Chauhan, Principal Investigator, AICRP Honeybees & Pollinators menden sür agia liasü, shibai ninang koda

tongtipang aser agroecosystem nung parnok kumzüka ayutsüba indang jembia liasü.

Iba sentong nung tongti tesemdanger Dr. Imtinaro L., Head, Department of Entomology, SAS, NU ajanga ninang-i mojitzü agütsüba mesüra danga by-product agütsüba kisüing masü saka pollination atema tongtipang shilem agiba indang jembia liasü.

Ninang aser danga shiruru temi naro apongba süngjanglijang aser süngdonglitong 'biological pollination processes' nung yarir aser meimchir nem chiyongtsü agütsür, ta lai ashi. Nisung takum alitsü asoshi

lai ninang wazüka ayutsü ayongzüka aser Nagaland ya ninangsep atenba tesem ka akumtsü asoshi ali rongsen peria lir, anungji aliyimer temi scientific yimya nung ninang metsüsüla, ta ashi.

Kiedipeu Meyase, Chairman, Ngwalwa Village Council ajanga sentong nung tesemdanger tongti ka ama jembidang ninang metsürtem dang scientific beekeeping indang tali angazüktsü ayongzüka liasü.

Pai aluyimer dang iba maangka agia ninang metsüba nung tanü-asüng yimyatem amshitsü ajungshia liasü. (Maneni tapak 8 nung...)

## GMS Keyake nung Oral Health training agütsü



GMS Keyake nung October 6, 2023 nü Oral Health for School Teachers indang training aser awareness sentong agidang tangokba noksa ka nung shisalen sayur aser training agirtem angur.

**Dimapur, Mongputeni/Oct. 06 (TYO):** National Oral Health Programme, Kohima District ajanga Oral Health for School Teachers indang training aser awareness sentong ka Government Middle School, Keyake nung October 6, 2023 nü agia liasü.

Tepang junga aser müreka ayutsü indang Dr. Mhonsenli Yanthan-i rateta ashi aser iba sülen Dr. Noyingbeni Khuvung ajanga common oral diseases indang PowerPoint presentation agüja liasü.

District Oral Health Offocer,

Dr. Simon I. Sumi ajanga moko achiba ajanga temang nung timtem agütsüba indang onük nung jembia aser tebo junga meyotsü yimyatem sayua liasü aser iba sülen tesayurtem den sensaksemba mapang agia liasü.

Iba sentong nung menden Khriesavilie Solo, Head Teacher GMS, Keyake liasü aser Imlimenla, Assistant Head Teacher, GMS Keyake ajanga melepzüng o jembia. Sentong nungsa toothbrush, toothpaste den IEC materials lema agüja liasü. Ona sentong nung tesayur 15-i shilem agia liasü.



Dehradun, Uttarakhand nung October 3-6, 2023 anogotem EMRS National Cultural Fest 2023 alidang Tuensang EMRS nungi Puchio Herrick P ajanga National Level Spot Painting Competition 2023 nung takok ngua liasü. Iba sentong ya NESTS Ministry of Tribal Affairs ajanga ayongzüka, kong Nagaland Team nungi kaketshir 19 aser tesayur ana liasü.



Delhi excise policy ken o dak sendakba nung ED-i AAP MP, Sanjay Singh apuba anema October 06, 2023 nü Amritsar nung AAP lenirtem aser pusemertemi longkak aitba noksa nung angur.

### Taruba hopta India nung G20 Parliament Speakers senden amentsü

**New Delhi, October 06 (Agencies):**

Taruba hopta New Delhi nung G20 züngsem linüktem nungi Parliament Speaker tem senden amentsü, aser iba mapang nungji India-i Canada nung Senate Speaker ajurua jembitsü, ta Hokolbarnü Lok Sabha Speaker, Om Birla-i metetdaksü.

Linük 25 nungi presiding officers aser G20 züngsem linüktem nungi deputy speakers 10 den tejaoker linüktem nungi ketdangsertem P20 senden nung adentsü.

Iba senden ya October 12 nungi October 14 tashi India International Convention & Expo Centre (Yashobhoomi) nung amentsü.

October 13 nü Ato kilonser, Narendra Modi-i G20 Parliamentary Speakers'

Summit (P20) senden tenzüksütsü.

Canada nungia Senate Speaker, Raymonde Gagne iba senden nung adentsü.

Tawa Canada Ato kilonser, Justin Trudeau-i, taküm June ita nung British Columbia nung Khalistani lenir, Hardeep Singh Nijjar tepsetba nung India-i shilem agi alitsüa akok, ta jembiba sülen India o Canada na tsüingda tesendaktep mejungi lia G20 Speakers senden amentsü.

Om Birla-i, "Iba senden nung jembitsü onüktem onoki shimogo," ta metetdaksü.

India nem tai tongloksütsü atema Canadian Parliament sabang amshiba atema India-i Canada Senate Speaker den iba onük jembitsü tebilemba lir.

Anogo asemnü senden nung

tejaoker 350 dak tema adentsü imlar. Iba senden nung Parliament züngsem 50, general secretaries 14, vice-presidents 26, International Parliamentary Union president aser Pan-African Parliament President-a adentsü.

9buba P20 senden atema omenji 'Parliaments for One Earth, One Family, One Future' asütsü," ta Om Birla-i osangbenertem nem metetdaksü.

P20 sendenji shilem pezü lemsar agitsü aser item senden nung onüktemji-"Transformation in People's Lives through Public Digital Platforms", "Women-led Development", "Accelerating SDGs" aser "Sustainable Energy Transition" asütsü, ta paisa metetdaksü.

### Trinamool Congress-i Centre anema maneni longkak aittsü: Mahua Moitra

**Kolkata, October 06 (Agencies):**

Hokolbarnü Trinamool Congress (TMC) MP, Mahua Moitra-i, Centre sorkari West Bengal nem MGNREGA scheme kübok sen tagütsütsü aliba aser social security schemes atema senotsü takhangba agüja TMC-i maneni longkak aittsü, ta metetdaksü.

Osangbener den jembidang Moitra-i, "Onok tangutsü aliba sen mangu tashi onoki longkak aittsü. Onoki Delhi nung longkak ait tenzük aser maneni Bengal nung longkak aiter. Angh (CV Ananda Bose ) meyiparuba onoki atar.

Minister (MoS) Sadhvi Niranjana Jyoti jena aoba ama pa (Angh)-a jena ao ama onoki bilemer," ta ashi.

Minister of State, Sadhvi Niranjana Jyoti-i, la indang office nung iba onük jembitsü atema lai ghonda ana tashi Trinamool MP tem ata-a liasü saka parnok maru, ta ashi.

Ajisüaka Moitra-ibo, minister-i yazü jembir, kechiyong minister-i Trinamool MP tem ghonda asem atadaksü, iba sülen la tesülen aliba kishileni jena ao, ta ashi.

Brihostibarnüa Trinamool Congress (TMC)-i Kolkata nung Centre sorkar anema

longkak aita liasü. Raj Bhavan kima anasa TMC general secretary Abhishek Banerjee leniba nung TMC lenirtem aikati longkak aitba nungji shilem agi.

Osangbener den jembidang TMC MP, Kalyan Banerjee-i, "Onoki maneni longkak aittsü, kechiyong parnoki nüburtem nem (anogo 100 aayangba indang) sen magütsür. BJP ya tiyazür ka lir. Parnoki yazü jembiba dak alaka o jembitsü mashi," ta ashi.

Siliguri nunga TMC nung inyakertemi longkak aita state Angh, CV Ananda Bose meina senzürtem dang wako tanak sayua liasü.

### Rajasthan Chief Minister-i state nung district tasen asem sangdong

**New Delhi, Mongputeni/October 06 (Agencies):**

Hokolbarnü Rajasthan Chief Minister, Ashok Gehlot-i state nung ano district tasen asem tentetba sangdongogo; ibaji densemabo state nung district ajak senteper 52 jungogo.

Gehlot-i X ajanga, "Nüburtemi akhangba aser committee-i benokba nung ajemdaker Rajasthan nung district tasen asem tenteter. Rajasthan nung district tasen asemji - Malpura, Sujangarh, aser Kuchaman City lir," ta metetdaksü.

Ashok Gehlot-isa, tarutsü nunga committee-i benokba nung ajemdaker iba dak sendakba onüktem atema inyaksü, ta metetdaksü.

Malpura district ji Tonk

district nungi alanzüka tenteter, Kuchaman City ji Didwana district nungi alanzüksü aser Sujangarh ji Churu district nungi alanzüka tentettsü.

Tamalen Rajasthan sorkari district tasen 19 tenteta liasü, ajisüaka nüburtemi ita trok tashi longkak aita akhangba agütsüba sülen Gehlot-i ano district tasen asem sangdonger.

Taküm August ita nung High-level committee kati Rajasthan nung district tasen 19 aser division tasen asem tentettsü benokba cabinet-i agizüka liasü.

State nung district tasen tentettsü atema tebilemba benoktsü asoshi yaküm March ita nung retired IAS officer, Ramlubhaya leniba nung high-level committee ka tenteta liasü.

### Küm ana tsüingda India nung Maoists samatsütsü: Amit Shah



October 06, 2023 nü New Delhi nung Maoists telungpur tebilemstü asadangtsü atema ayongzükba senden nung Union Home Minister, Amit Shah aser National Security Advisor, Aji Doval na adenba noksa nung angur.

**New Delhi, Mongputeni/October 06 (Agencies):**

Hokolbarnü senden ka nung Union Home Minister, Amit Shah-i, taruba küm ana tsüingda linük nung Left Wing Extremism (Maoists telungpurtem) meshimeshia samatsütsü, ta metetdaksü.

Maoists telungpurtemi timtem agütsüba state tem nung security tensa asadanga senden nung Amit Shah-i, tesüiba küm 40 tsüingda Maoists telungpurtemi timtem agütsüba state tem nung raraba aser nisung asüba tajemtiba kümji 2022 küm liasü, ta ashi.

Taruba küm ana tsüingda linük nung Left Wing Extremism meshimeshia samatsütsü, ta pai ashi.

"Maoists-i timtem agütsüba ya meimchir atema atakatem lir, ibayongji onoki iba tebilemstü ya tera nungi atsüdoktsü telemtetba agi," ta pai metetdaksü.

2010 küm Maoists-i timtem agütsüba state tem nung raraba medemdangra 2022 küm nungbo shilem 77 agi tajemba liasü, ta ketdangsertemi metetdaksü.

Hokolbarnü iba senden nungji Maharashtra, Andhra Pradesh aser Jharkhand nungi chief minister tem aden. Maharashtra Deputy Chief

Minister Devendra Fadnavis-a iba senden nung aden. Ajisüaka Odisha, Bihar, Madhya Pradesh aser Chhattisgarh state tem nungibo minister tem ang aden, ta ketdangsertemi metetdaksü.

Tesüiba küm pongu tsüingda linük nung LWE security tensa kanga tajungba kümogo, ta ketdangsertemisa metetdaksü.

2015 küm Centre sorkari Maoists telungpur tebilemstü anema inyaksü atema 'National Policy and Action Plan to address LWE' agizüka liasü.

Iba mapatong kübok security dak sendakba asalentong yanglua inyaker, terenlok mapatem inyaker aser nüburtem nem temeden balala agütsür. Iba mapatong benokba ajanga linük tesem balala nung Maoists dak sendakba rara kanga ajema kümogo, ta ketdangsertemi metetdaksü.

2010 küm den medemdangra 2022 küm nungbo Maoists dak sendakba rara shilem 90 agi tajemba liasü; 2004 küm nungi tenzüka 2014 küm tashi nung Maoists dak sendakba rara 17,679 liasü aser nisung 6,984 asü, ta Ministry of Home Affairs-i metetdaksü.

Iba denji medemdangra 2014 küm nungi 2023 küm June 23 anogo tashi nung Maoists dak sendakba rara 7,649 dang liasü aser nisung 2,020 asü.



October 06, 2023 nü Hyderabad yimti tejenba nung AIMIM Tir, Asaduddin Owaisi-i (ajichilen mezüngbuba) tawa yanglushiba Historical Fountain (Gulzar Houz) semzüksüba sülen tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 07, 2023

### GB ya nüngja melentsü asü ?

**A**nogo ishika jakdang Dimapur nung New Market Goanbura, Muslim nunger ka telongpurtemi pua bener aoba maparen nung meimlaba saka nüngdak ken o aika temai adoka jembiteptsüsa kümogo. Iba kasa onük nung nisung karibo town nungbo Goanbura menügdaka ta yimjak nung metetdaksüba asenoki angashiogo. Atangji, Goanbura ya asen Naga nunger oshi masü saka asenok Assam kübok alidang jajetba tenüng asüba agi Assamese oshi nung yimtak alir tambusang mesüra tainer ta jajetba tenüng ka lir. Iba tangatetba jagi town nung Goanbura ta ajatsüba jagi tenüng o tetezü naji mapet angateter südi. Aji oda, New Market Dimapur nung Muslim nungba Goanbura-baji shirnoki kechiba apu ta bushisüngdangtsüba mapa dang nungibo, town nung Goanbura alitsüba jagi tim asü masü ? Aser Nagaland nung tsümar ka Goanbura shimbaji tim asü masü (?) ta asüba tasüngdangbatem nungang tama telangzüba bushitsüsa kümogo. Atangji, kodang asenoki Goanbura aser Goanbura-i inyakba mapa na ya medemdangdir, tenüngbo tulu saka mapaji tuluri inyaksüla mapa masü agütsür amai repringteter, kechiyong yimtak tainer mesüra tambur ka government nung ketdangsertemi tenyatenponglen dang senzüdaksüba asenoki angur. Ibaji dang masü saka tanü asüngbo tenüngbo Goanbura saka arishi kümbo tain masü lanu dang ta asüba Goanbura-tema ajurur. Ashiko, British nunger mapangbo yimyaklirtem rongnung tambusang shimer parnok yimten mapa nung shisa agia yaritepdaksüba agi, yimyak tambusang, Goanbura ta jatet asütsüa akok. Aji petpeter aser British nungertemi Goanbura-temji parnok yimten yimsüsüba maparen nung teyarir ama dang masü saka nübortem rongnung obendanger amai amshia liasü. Itemji tanü tensa Goanbura inyaksangshi den kodang medemdangdir, government-i yimtak yimtsüng nung timtem mangatetep atalokba mapang dak alaka Goanbura-tem ya yimten yimsüsüba aser obendanga maparen nung amshiba mangur. Atangji, Goanbura ita sen a mali, anungji office-a balaka mali, aji oda government-i nüngdak mapang angati tenyatenpongtsü ayuba amai dang lir. Itemji bilemdangra, Goanbura nüngja aser parnok nem agütsüba tashi aser mapatema khen meyipa repringshitsü nüngdaka repringteter. Ashiko, British nunger mapang 1945 küm Goanbura nem tashi agüja temzüng ozüng latetba sülenbo Goanbura-tem dak aketba tashi aser mapatem indang arla latetja Nagaland state nung temzüng ozüng balaka malitsüa akok. Aji oda, tanü putu nungbo Goanbura shimer tula temerem ka kisüng agütsüba jagi meperitsü, ajisüaka tanüa Goanbura yudi süra ita sena agütsütsüla aser yimten mapaa agütsütsüla. Atangji, tanübo British nungertemi agütsüba tula temeremji masü saka asenoka asen dak apet tenünga dena melener tulu süoshi kar purapiteta yanglur agitsü mapang agi tongogo ta bilemer. Asenoki meteta alitsüba tongtibang kaji, Goanbura-sa süaka Nagaland nungbo kin shia tashi balala, anungji Sumi nunger Goanbura daksa tashi aser akhüm tuluba alitsüa akok, kechiyong Sumi yimtak Goanbura yabo yimkümer dang asür aser par yim madakji pa kibur asür. Ajisüaka, Naga nunger tanga kintem rongnungbo yamaji masü, yimeri shiba mulungdir paji shimdaksür aser yim madakjibo pa kibur masütsüa akok. Ajisüaka, Goanbura ya teshimbo government-i shimer asünungji, government tsüngdangbo parnok ajak kasasa dang lir. Item ajakji bilemdanga Goanbura ta asüba tenüng ya mapa dak apet tanga tenüng ka agi melener amshi nungbo, atangji, yimtsüng nung dang masü saka town nunga tenüngji petpeta amshitetsü. Atangji, Nagaland nung tsümar ka Goanbura shim ta asüdagji, kodaser ? ta aika mulungjang nung asüngdangtsü. Ajisüaka, Dimapur yabo, Nagaland nungsa süaka balaka, kechiyong Naga nunger dang nungi tama Marwari, Bengali, Nepali aser Muslim nunger aliba mepu aika lir. Aji oda, tsümar asüyonga 1963 nung adokba mezüng Nagaland electoral roll nung pa mesüra la mesüra parnok tsüraburtem tenüng lira, parnokjibo Nagaland nung lisopurtem akümer, anungji parnok rongnungbo Goanburaji parnok asütsüsa akümer. Aji dang masü saka Dimapur-1 Assembly constituency nungbo parnoka election-i itettsü.

## OLEMSABANG

### Tatemsabuba Rara

Odi Jamir, Longbok Lemtur & S. T. Yapang Lkr

ABAM 1986 lemtet dak sentakba nung telok aser neja balalai züluba aser jembiba asenoki angashidar/züngdar, telok rongnung tilaba tuluba ta mali ajak kasa, par telok kotika ulu, yamaji onoka kasa aser ner teloka kasa. 1986 Lemtetba ya telemta ka ama karibo jembidar/züludar, ABAM nung tenzükertemi item pur dak tsüngbang kar koya majem kazür ama temulung lemer kazür asü ta bilema repranger, onoki bilembaji tai asütsü akok, ajisüaka ki arungnübo tsüngbang tesatempa aser tammangtiba ka nung jenoka liaka jenbutsu lenmang mali. Tanü yabo ABAM nung tenzükertemi kuli kecha magütsür, anungji ya azüki nung mi senokba maparen dang mesüka lir, kobai tsüngbang aser yangji temulung lema jenoka alir ajak mitsü kümtsütsü shingaia meteta maka. ABAM nung yim ka mejeta shisa tuyur yua maka anosa ABAM ya shinga yim/arogo küboka masü.

ABAM-i 1986 lemeteta ayu, ajisüaka temzüng ka magütsü, aji agi Lemteta akaba ka telemta lemtet ka ama mebilemli; tanü tashi koyimba mesüra koba arogo mesüra nejai ashishitepa ABAM 1986 lemtetba melenshidaksüba mali. Iba 1986 Lemtetba ya tatem aser ABAM yangji noktaka lir ta Molungkimong aser Molungyimsen Arogo anaprong dangi mapang balala nung ABAM ES-i shiti ajanga jangja zülur yokogo, aser iba arogo anaprongi yangji 'nonga' ta shia noktaka angashia mali.

Tang ABAM nung Molungyimsen akümba kuli mesüra Molungkimong nung tamanger reshikangshi asüba/masüba indang mangatetep kecha angazüka mali, anungji item otsü züluba agi kecha teloka aser shinga mangmangkora masütsü aser tang teptaka akaba keno den kecha sentaktepa maka nungji iba otsü zülutepba agi keno nung tetsükdaksü kecha malitsü imlar.

Kari ABAM 1986 Lemtet nung 'Nüngdakra zülua aliba kuli o (documents) bushiteptsü' ta lapoktsüa aliba ama kuli tejangja ngutetaka ABAM dangi bener marui lira aji tim masü, kuli miimbanga ayutsü mesüra okadak ang obendangtsü tashi atateptsüji tim masü. Kechiyong ABAM-bo lemteta akaba nung aotsü aser yamaji odar. Ajisüaka tenzükere kari Mungdang lemtet anema pei jurila aibelen lira ajibo Mungdang khuret masü, pa/laji Tsüngrem tenzükere ka asüyonga kin kidong aser yimer lir, ajisüka aji pa/la neja khuret.

ABAM 1986 Telemtetba ya kudasür tenzükere tatsü agi repringdangdi, ABAM central council 1980 telemtetba zünya 42 nung yamai zülua lir "Molungkimong arogo otsü nung koba mangatetep mapang talangka kaa aru ibaji tembanga repringshitsü atema iba special committee mungdang tenüng nung Mungdang mendenbubai shimteta agütsür. Iba committee yaki tamalen inyaka aliba maparen ajunga shisadanger kechi telemtetba arudir aji tatembang asütsü mungdangi parnok nem tashi ajak agütsür" iba committee nung parnok 17 shimba angur. Iba Special committee tebushitetba 1981 küm tatem mungdangi bener arua agizükba zülua mangur, iba melena 1981 central council telemtetba zünya 61 nung yamai zülua lir "Molungyimsen arogoi kechi temulung masü o arur ibaji repringtsü atema special committee itemi shimer" ta sür parnok nisung 15 shimtsüba angur. Iba Special Committee tebushitetba 1986 nung bener aru aser kecha arogoia mashishi nungji Mungdangi agizüka ayu, aser tanü tashi shingaia ashishia anema noktaker melenshidaksüba mali. Ajisüaka tajung kaji "Nüngdakra zülua aliba kuli o (documents) bushiteptsü akok" ta lapoka yutsüba ya junger, küm aika lir ang anguyonga kechiba tang ang angu? ta asütsü mali, ajisüaka shiri documents tejangja ngutetdir ABAM nem tekaraba nung metetdaksüa temelenshitsü melenshitsü junger, ajisüaka itemji ajak len nungi repringshitsü mapang agütsürang melenshitsü tim. Küm noklangka süir ang kuli tejangja ka ngutetba agi tamagitsü ta mekümtet, yamaji iba 1986 lemtetba nungsa tenzükere kari miima aibelena linyaka alinunga arogo tsütsüa küm aika süiba agi temeshi mapa ta mekümetet aser alima ozüng tsüngdanga küm 25 shi ayuba agi miima inyakba mapa ka temeshi ta mekümtet, anungji tanü yabo tasür ka süa ali nung arem yongbo iba keno ya akümliri tatem tongtsütsü, kechiyong ABAM nung tang tenzükertem yaa melenteptsü, tasüa asütsü akok, yamaji keno benoker rongnunga item keno metembangjungi arishi aseni yua maka nungji asüama ajurutsüa shingaia meteta maka, ajisüaka akümliri iba keno tembangtsütsü. Tasürji ali nung aremtsü aser akümlirji satoksatoka alitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Missouri nung pastor Rev. Dan Smith gari lendong nung asü



Rev. Dan Smith

**October 06, 2023:** New Haven, Missouri nung aliba St. Peter's United Church of Christ nung Rev. Dan Smith-i pastor inyaksü tenangzükba agiba sülen ita asem shi dang lirbo gari meküpa lendong ka nung süogo; pa arrshi küm 67 liasü.

Taoba Hokolbarnü iba lendong nung tanur ana densema nisung pongu asü. Illinois nung truck tilaka nung 'anhydrous ammonia' bener toudak mapang gariji meküpa aser 'anhydrous ammonia' ji tesadang shi yimshia liasü.

Hombarnü (October 2) Arogoi Facebook post ka ajanga, "Ozü pastor Dr. Dan Smith asüba onoki tejashi nung sangdonger. Hokolbar aonung

(September 29) Teutopolis, IL anasa truck tilaka nung 'anhydrous ammonia' bener meküpa lendong nung Dan asü. Iba lendong nung asürtem nisung pongu rongnung Dan densema liasü," ta metetdaksü.

Arogoisa kasa sangdong ajanga, "Onoki Dan'er jabaso Micah Smith, par aianu Sande Hardy aser par kibong züngsemtem den külemi par medemertem den mangyim jashi lemsateper. Yimlibilema iba lendong nung asür nisung pezü kibongtem aser yirua alirtem atema sarasademjang," ta mepishia metetdaksü.

Kasa lendong nung asürtemji Teutopolis nung alir Kenneth Bryan, aser par tanur

ana- Walker Bryan aser Rosie Bryan na, aser Twinsburg, Ohio nungi Vasile Cricovan nung liasü.

Osang angazükba agi truck anisang jagi tanga gari ka den metsükteptsü atema paidokba sülen anena aliba gari ka dak tsükoktsü. Iba sülen truck nungji tapok tuluka paa 'anhydrous ammonia' ji gallon 3,500 shi yimshi.

St. Peter's Arogoi ashiba agi, taküm June 11 nung ang Smith-i pastor inyaksü atema tenangzükba agia liasü. Pa yaküm February 1 nungi iba Arogo nung inyaka liasü.

Iba jakang pa Methodist Arogo ka nung küm 20 pastor inyakogo.

## Arogo lenirtemi Yirusalem nung Khristantem kümzüktsü mepishir

**Jerusalem, October 06 (Agencies):** Tawa Yirusalem nung Khristantem anema inyakba kanga bulua akümba mapang nung alima tesem balala nungi Arogo lenirtemi Israel nung Khristantem kümzüktsü atema takhangba agüsür.

Tawa Yirusalem nung yimsü alia amanger Yihuda nung kari Khristantem dak metzü metsüloktsüba video ka prokshiba sülen nisung aikati iba tatalokba aitsüdar.

Yirusalem nunga Arogo lenirtemi alima kintem dang yimsü alia amanger Yihuda nung kari Khristantem kümzüktsü atema takhangba agüsür.

Talisa anüdoklen Yirusalem nung Yihuda nungertem Khristan lenirtem anema inyakba aser Arogo kiojentem raksatsüba tatalokba aika lir.

World Council of Churches (WCC) densema Khristan organization balalai Yirusalem nung Khristantem kümzüktsü akhanger.

Yirusalem nung World Council of Churches Coordinator, Yousef Daher-i, "Israel-i security magüsüteter

aser ozüng alema inyakertem menokdangteter, anungji onoki alima kintem dang security akhanger," ta metetdaksü.

Lutheran World Federation-ia yimsü alia amanger Yihuda nungertem Khristantem anema inyakba atema tebilemstsü akaba lemsatepba den külemi Temeshi Lima nung Khristantem kümzüktsü atema takhangba agüsür.

Orthodox Patriarchate of Jerusalem-ia kasa takhangba agüsür.

Tawa Yirusalem nung temeshi aini aoer bendanger Khristantem telok ka Kangki ka amer Tenla kidang nungi aluba mapang nung Yihuda nung kari parnok dak metzü metsüloktsü.

Khristan karibo iba tensa ya ano tamajungba akümtsüa akok, ta bilemer.

Ano külen Vatican-ia Israel sorkar den iba tebilemstsü onük lemsateptsü tebilemba lir.

New Jerusalem Cardinal, Pierbattista Pizzaballa-i yimsü alia amanger Yihuda nungertem aitsüba den külemi Khristantem anema inyakba tatalokba bulua akümba atema yimten aitsü.

September 30 nü Pope

Francis-i Pizzaballa Cardinal shima liasü.

Pizzaballa Cardinal shimba ya Vatican-i Yirusalem ya tongtibang, ta züngshiba temaitsü lir.

Palestine nung Khristan temeden atema inyaker, Rafi Ghattas-i, "Iba ya alima nung Khristantem dang Yirusalem Arogo nungi lenir ka (Rome nung) menden ka atatsü ta nenshia metetdaksüba lir," ta ashi.

WCC nungi Yousef Daher-i, Khristantem anema inyakyonga police-i menokdang, ibayongji joko police dak-a melung melemteter, ta ashi.

Paisa, "Arogo lenirtem aser police tsüngda tesendaktep junga mali, kechiyong police-i security magüsür ta parnoki tai tongloktsür," ta metetdaksü.

Lutheran World Federation-i, mapang ka nungbo Yirusalem nung Khristantem samaadoktsüa akok, ta ashi.

WCC nungi Daher-ia, "Yimsü alia amanger Yihuda nungertem parnoki tashiyim amshia Khristantem meindoktetsü, ta bilemer," ta ashi.

## ANO GO ABEN TSÜNGREM DEN

## Ne Tsüngrem Ajurutsü Renemang

Aser Kibubai Mosa dang ashi, Nisungtem dangi oang, tanü aser asüng parnok meshitetta yuang, aser parnok süoshi shidokjang, aser tasemnübuba asoshi renema liang: kechiaser tasemnübuba nung nisung ajak tsüngdang Senai tenem manung Kibuba alutsü. Anitet 19:10-11

Tsüngrem den ajuruteptsü terenemba nüngdaker. Tsüngremji tesüngmangtsü aser tabensa temeshi lir. Merenemi Tsüngrem tsüngdang nokdakbaji tesempatsü mapa lir. Israel chirtemi Tsüngrem den ajuruteptsü asoshi parnoki anogo ana renemtsüla ta Tsüngremi parnok nem ozüng agüsü. Kodang nisungtem renema liasü Tsüngremi tsüngmok aser tsüngpret, mi aser mokozü aser jemji ola dena nübura tem den jembi (Anitet 19:16-25). Iba tajurutepba nübura Pa jenjang nung alitsü asoshi Pai parnok nem ozüng ter agüsü.

Iba yagi ne kolok, temulungtetba aser ne mulungjang nung mapa meinyakdaksüi anogo shiaji süidaktsütsü makok. Ibai Tsüngrem leman nungi pilatsü mapang talang ka magir. Alimai ne tanelaren samatsütsü mapa inyaker. Nübura alima nung anogo terok lir tenetnübuba nung Tsüngrem dang aser parnok asoshi Pai mulungba nung anogo tepiyong ranglokdaksütsü asoshi Tsüngremi Sabbath tentet.

Nai ne mapang tekülem asoshi renema alir asü? Taküm mapang matongdang ne mulungjang kechi agi süngdaksür? Aonung ne mulung nung bilemba aiben anepdang ibajisa bilema alir. Temerük tekülem asoshi tanelaren terenemba tenüngdaksü. Nai tekülem nung ajangshiba jagi ne tanela renemba nung yaritsü. Tsüngrem den ajuruteptsü asoshi ne sasa renemang.

## Plateau state nung Khristan 8 tepset

**Abuja, October 06 (Agencies):** Amongnü amokmerener," ta paisa metetdaksü.

(October 1) Plateau state, Nigeria nung Fulani telok aser kiralongrartem Khristan 8 tepset aser Khristan pongu yirutsü.

Kiralongrartem Bassa Plateau State nung County nung Kwall District kübok Du yim amakba mapang nung tanur ana densema Khristan 8 tepsetogo, ta Irigwe Development Association (IDA) otongdar, Davidson Malison-i metetdaksü.

"Aonung 8:10 ako meta Fulani telok yimtsüng tonga aruba sülen Khristantem dak injang khaloktsü. Kiralongrartem arrshi küm 9 aser 11 tanurtem densema khaset," ta pai ashi.

Paisa Nigeria sorkar dang aibelenertem aputsü atema security sepaitem nem tetuyuba agüjang, ta mepishio.

"Kiralongrartemji Nigeria sorkari meteta dang lir, kechiyong parnokji tenük agi manguba tanela masü. Tawa parnoki Khristantem kanga

metetdaksü.

Malison-i, "Onoki iba tatalokba atema dang jashir masü saka onok temelung kanga raksar, kechiyong Plateau State nung Khristantem kiyonger Muslim nungertem den jungtepa tesünep nung dang lia aruogo saka tangbo tensa melenshiogo," ta ashi.

September 27 nüa Plateau state kübok Atuhun Panyam yimdak kiralongrartem Khristan asem tepset.

Khristan lenir ana- Longse Jokle aser Joshua Gufwam nati sangdong ka ajanga, "Atuhun Panyam nung Fulani teloki ozü adianu asem: Panshak Peter, Ishaku Zumuk aser Yakubu Sokes nung tepsetba atema onoki mangyimer. Tasü mang asemprongji alu nung anguba sülen pepei yimtsüng nung remtsüogo," ta metetdaksü.

Tenatisa security agencies dang Plateau state nung Khristantem kümzüktsü mepishi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sangpuyak**

(n) sangpu lima nungi menar aruba tashidak wara, yaksü (small pox)  
\* Tanur asüba mapang nisung aika sangpuyak agi shiranger.

**Sangra**

(adj) terajem aser techira shisatsü (clever)  
\* Kinungtsü sangraba agi kinungbo timtem nungi kümzüker.

**OLONG PAITEP # 6659**

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
						25				

**TIPIEN**

- 1. Tebendang mali - (4)
- 6. Ajunga / Songjen - (7)
- 7. Mali / Maka - (4)
- 9. Tasen ka adok - (6)
- 11. T \_ \_ \_ ng - (3)
- 13. Moi ata - (5)
- 16. A \_ \_ \_ üm - (3)
- 17. Tar tatsü - (6)
- 20. Tashi maküm - (4)
- 24. Tenüing kasa - (7)
- 25. Kilem nung atongba - (4)

**LANGTSÜNGLEN**

- 1. Yong agi atakba oset ka - (3)
- 2. Langtem - (5)
- 3. O tamendakdak - (4)
- 4. Nütsü tebuba - (3)
- 5. Anüingdang tesarawa - (3)
- 6. Apitet - (5)
- 7. Shirangdang achiba - (4)
- 8. Anogo semer ka - (3)
- 10. Tepok telung nung shilem ka - (3)
- 12. Temba - (4)
- 14. Teka amtep - (5)
- 15. Tenüing atet - (3)
- 18. Mejanga onü - (5)
- 19. Talak, techira - (4)
- 21. Maneni - (3)
- 22. Nübo teyi - (3)
- 23. Aginüdaktsü - (3)

**OLONG PAITEP # 6658 TELANGZÜBA**

**TIPIEN :**

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nungjem, 25. Süra.

**LANGTSÜNGLEN :**

- 1. Khu, 2. Sujuk, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju,
- 21. Ano, 22. Onü, 23. Kua.

**NAI-A YA METETTER MA**



2009 küm April 18 nü Italy lima Milan yimti nung Canada nunger nisung ka tenüing agi Aaron Caissie-i tejak nung spoon teimtiba metsükdaktsüi yutetba alizüing yanglutet. Pai tejak nungji khen nung spoon ter tenet metsükdaküi yuteta iba alizüing tongtet.

**Happy Birthday**

**APIJEMLA AOCHIR AIER**

Tasoba anogo : October 7  
Küm : 4  
Talidak : Kuda C, Half Nagarjan Dimapur

Onoki kanga dang meimba jala tenüing dak jaloka Tsüingrem tauchi agi arishi küm 4 tashi len anir aruba atema Pa nem tenüingsang agütsür. Tsüingremi nü taküm nung teti tepela aser temeim molamoshia lidakjang ta onoki sarasadema nü tepela tasoba anogo amonger.



- Oja, Oba aser na meimertem.

**Bodo kaketshirtemi Bodoland University VC agientsü akhanger**



**Kokrajhar, October 6, 2023**

**(Agencies):** All Bodo Students Union (ABSU) züingsemtemi tanü Kokrajhar nung aliba Bodoland University jakdang Vice Chancellor Dr Laishram Ladu Singh anenjang ta takhangba agüja lungkak ait.

Dr Singh-i ochimashi inyakba atema Directorate of Vigilance & Anti Corruption aser Chief Minister's Vigilance Cell-i pa apuba sülen

ABSU-i Bodoland University VC anentsütsü takhangba agüja arur.

ABSU kaketshirtemisa Assam Governor-i inquiry committee ka tentetba aitsür.

Iba inquiry committee-i bushisüingdanga aruba nung temulung masür anungji Dr L. Ladu Singh mapa nungi anentsütsüla ta parnoki ashir.

Yaküm May 30 nü Bodoland University vice chancellor nungi sen aika tim

mesüi amshiba putet. CM Vigilance Cell-i university documents asem apu aser Vice-Chancellor Dr L Ladu Singh apuba sülen pa bail nung chiok.

ABSU-isa Assam Chief Minister Himanta Biswa Sarma dang iba onük atema mapa inyaktsü ayongzüko.

Parnoki October 11 nü iba ken o atema lokti lungkak aitba sentong tulu ka ayongzüka agitsü osang metetdaktüsüo.

**Mizoram AAP züingsemtemi MP Sanjay atema lungkak ait**

**Aizawl, October 6, 2023**

**(Agencies):** Aam Aadmi Party (AAP) indang Mizoram unit-i Rajya Sabha MP Sanjay Singh apuba anema Aizawl nung lungkak aitba sentong ka agiogo.

Delhi liquor policy ken o dak sendakba nung Sanjay pua lir aser tanü AAP züingsemtemi PM Modi indang noksa rongdoka lungkak ait.

AAP züingsemtemi Treasury Street Aizawl, Mizoram nung adenshir BJP-i aniba sorkar

anema yimyim ayim.

"Sanjay Singh-i Manipur tebilemstü osang benok, iba jagi pai tepuokdak ayu asü?", "Sanjay Singh-i Modi Adani tesentaktep yimjak nung metetdaktüsütsü, iba jagi pai tepuokdak ayu asü?" ta AAP züingsemtemi tezülubatam amer lungkak ait.

Enforcement Directorate (ED)-i October 4, 2023 nü AAP MP Sanjay Singh apu.

ED-i Sanjay Singh'er ki mita aoba sülen pa apu. 2021-22

tsüingda Delhi excise policy nung tim masüba maparen liasü ta tai tonglokja lir.

Prevention of Money Laundering Act kübok Sanjay Singh apur, ta ED-i metetdaktüsüo.

Taküm küm tetenzklen ED-i taoba Delhi Deputy Chief Minister Manish Sisodia anema ken o benoka liasü. Dinesh Arora ta ser restaurateur kati Manish Sisodia aser Sanjay Singh na den tesentaktep tajung liasü ta ED-i ashi.

**MNF MLA K Beichhua-i BJP ticket amer tokteptsü**

**Aizawl, October 6, 2023**

**(Agencies):** Taküm küm tatemlen Mizoram Assembly election agitsü jakdang MNF MLA K Beichhua-i menden toktsüogo.

October 6, 2023 nü Dr. K. Beichhua-i Assembly Speaker

ket nung pa anenba shidi agütsü. 2018 Assembly election nung pai Siaha Bial menden nungi toktepa MLA aküm.

Taoba Minister Dr. K. Beichhua-i MNF nungi anenba shidi agüja liasü.

Ita ishika tejakdang Chief

Minister-i Beichhua minister menden nungi anenja liasü.

Dr K. Beichhua-i Siaha constituency nungi BJP ticket amer tokteptsü.

Dr. K. Beichhua-i MNF ticket amer Siaha constituency nungi anaben tashi MLA aküm.



October 6, 2023 nü Manipur Chief Minister N Biren Singh-i Imphal West District "Integrated Sewerage System for the City of Imphal Phase-II" project tenzüksüba angur. Rs 650 crore endoka yanglutsüba mapatong atema Union Home and Cooperation Minister Amit Shah-i January 6, 2022 nü video conferencing ajanga lung azünga yutsü. "New Development Bank nungi Rs 650 crore endoka iba mapatong ajanga urban flooding khuret ajemtsü aser nübortem nem tzü tajemtsü agütsütsü. Lamphelpat Water Body ajanga eco-tourism ajungkettsü aser rongsenketzung maongka angutsü" ta Chief Minister Biren Singh-i metetdaktüsü. (Imphal, October 6)

# Syrian military academy nung nisung aika tepset

**Homs, Mongputeni/Oct. 06 (Agencies):** Syria anüolen Homs yimti nung Brehostibar nikongdang military academy ka nung drone amshia amakdang nisung 89 asü, ta Syria indang health ministry ajanga ashi.

Tapoktsü oset bena aliba drones ya graduation sentong ka dak tenük yoka liasü, kong cadet indang kinungertem dena liasü, kong tetsür aser tanurtem densema asü.

UK nung amenoka aliba monitoring group-ibo iba lendong nung nisung 116 asü ta ashi.

Syrian army-iba lendong ya mejangjaba international forces temi yariba kiralongrar teloktem mapa lir ta tenüing asener.

Ajisüaka sorkar den raraba tsükchir aser jihadists temia tenüing agia mali.

Drone ya opposition kübok aliba Homs indang north-west len nungi yok südi ta amanger.

Mapang tatsüka lir monitoring group Syrian Observatory for Human Rights (SOHR) ajanga ashiba agi, opposition tashi ita aliba Idlib province kübok yimti, jila aser yimdak yimtsüngtem aser Aleppo nung sorkari bomb pokloksüdang civilian 11 asü.

Homs military academy nung nikongdang graduation sentong temli tapoktsü oset bena aliba drones kar yoka liasü, ta General Command of the Armed Forces nungi sangdong ka ajanga ashi.

Ibai kodanga lima nung refugee ama mesüra majangshidangba mapa tamajung ka lir ta armed forces temi züngshir aser item kiralongrar telok ya kong lidir liaka telangzüba tesashi agütsütsü temolungtetba lir, ta sangdong ajanga ashi.

Iba lendong nung nisung 277 yiru aser asürtem rongnung tetsür 31 aser tanur pongu lir, ta health ministry ajanga sangdong ka nung ashi.

Sentong tembangba sülen nüburtem courtyard bushia alu aser idangji bomb ya pokloksü. Item tapoktsü oset ya kolen nungi aruar onoki mejangja saka ali sünga nisung tasü mang liasü, ta yangji ki naro inoker kati ashi.

Iba lendong atalokba sülen video ka prokshiba nung nisung tasü mang aika liasü aser parnok kinungertem jara agi lungbanga aliba tesem ka telung nungi teyari meshia ayimtena liasü. Iba tesem nung prangbong ola angashia liasü.

Iba sentong nung Syria indang defence minister-a aden saka lendong ataloktsü minute ishika lia ayazüka orr liasü, ta SOHR ajanga ashi.

2011 küm Tir Bashar al-Assad-i yimjung nung democracy bhukuma longkak aiter dak tashiyim amshiba sülen civil war adoka Syria nung nisung million tesadang dak tali takum samaogo.

Nisung million 6.8 shi linük telungzük nung süaka tesem balala nung prokshia lir aser ano million trok shi bendang

limanung refugee ama mesüra asylum bushir.

UN indang special envoy for Syria, Geir Pedersen-iba academy nung amakba ya tetsübotsüka lir, ta ashi aser rara nung telok ajunga dang akok tashi aremzükteptsü ajungshia liasü.

"Telok ajaki international law kübok pei teinyaktsü mapa tem akumtsübotsüla aser civilian aser civilian ki o jen kumzüka ayutsüla," ta pai ashi.

"Tanü atalokba yagi Syria nung aliba status quo nung tashi maitba jangjatsür aser yimtenren tsütsü lenmang tejangja ka mali tashi security tensa densema maneni tamajungba akumba asenoki angutsü."

Ano Brehostibarnüsa Syria northeast tsütsü Kurdish nung kübok aliba region nung Turkish drone amshia amakdang nisung ter tepset, koba Ankara nung bomb ka amshia amakba Kurdish telungpuri tenüing agia aliba mechi lir.

Iba mapang US-i yariba Syrian Democratic Forces (SDF), Kurdish-i aniba militia alliance, Qamishli nung power station ka, Hassakeh anasa water station ka aser totzü atsüba tesem ka densema tesem 17 nung amak, ta SOHR ajanga ashir.

Syria nung ozü sepaitem anasa aliba armed Turkish drone ka US mitkar temi khazüka yok, ta US ketdangsur temi osangbener dang ashi.

# Ukraine: Hroza nung missile agi nisung 52 tepset

**Kyiv, Mongputeni/Oct. 06 (Agencies):** Ukraine northeast tsütsü Hroza yimdak Brehostibarnü missile ka khaloktsüba nung nisung 52 süogo aser iba lendong yagi kibong ajak dak kongshi, ta Interior Minister Ihor Klymenko-iba ashi.

Kharkiv region kübok café ka nung missile khaloktsüdang asürtem rongnung arishi küm ti tebur ka densema lir.

"Yangji kibong ajak nungi nisung liasü," ta Klymenko-iba ashi.

Ukraine indang defence ministry ajanga iba lendong atalokba atema Russia tenüing asen aser yangji mitkar kecha meliasü ta ashi.

Russia-iba yimtsüng amakba indangbo indang-indanga mashi.

Saka Russia sorkar meyong Ria Novosti news agency ajanga ashiba agi, Russian mitkari Kupyansk district nung Ukrainian targets nung tayimtsü aser artillery amshia tesem 20 amak, kong Hroza

yimtsüng ya lir. Parnoki kodang amakar mashi aser Hroza yimtsünga metetshi.

Russia-iba Hokulbarnep nungi tenzüka Kharkiv yimti nunga missile amshia amak, ta Mayor Ihor Terekhov-iba ashi.

Ukrainian TV den jembidang, nisung aliba ki ka nung missile khaloktsüdang arishi küm ter tebur ka asü, ta pai ashi. Nisung 20 dak tema yiru.

Tang tesüsa amakba nung Russia-iba Iskander ballistic missile tem amshia alitsü südi, ta mayor-isa ashi.

Anüngdang tekumzüker temi tetsür ka tasü mang ngutet, shiba tanubosang tetsü (grandmother) liasü, ta Kharkiv regional head Oleh Syniehubov-iba ashi.

Brehostibarnü Hroza yimtsüng nung alirtem ya iba yimtsüng nungi Ukraine sepaia ka asü-pila sentong nung lia missile ya khaloktsü.

Iba lendong nung sepaia kinungtsü, par jabaso aser jabaso kinungtsüa asü, ta

yangji aliba prosecutor Dmytro Chubenko-iba ashi.

Taoba mapang iba sepaia ya Dnipro nung rema liasü, saka par kinunger temi par yimdak remnüa liasü.

Iba asü-pila sentong nung adenertem ya chiyongtsü atema mena lia café nung missile ya khaloktsü, koba yimtsüng asoshi grocery store ama lir, ta ketdangsur temi ashi.

Ukrainian TV den jembidang Klymenko-iba ashiba agi, Russia-iba mamakdang Hroza nung nütsüng yongsük 330 liasü.

Kibong shia, kilen shia iba lendong agi kongshio, ta pai ashi.

Osang kar ajanga ashiba agi iba café nung Iskander missile khaloktsü, ta minister-isa ashi.

Iba mapa dang ya temenen mapa ta mejatet, kechiaser ibai temenen asoshi mezüngmeshi lir, ta Ukraine Tir Volodymyr Zelenskyy-iba ashi.

Hokulbarnü nungi tenzüka Kharkiv region nung asemnü mangyimtsü sangdongogo.



NATIONAL PENSION SYSTEM TRUST (NPS TRUST)  
(Regulated by Pension Fund Regulatory and Development Authority)  
14th Floor, IFCI Tower, 61, Nehru Place, New Delhi, Delhi 110019

07.10.2023

## RECRUITMENT NOTICE

National Pension System Trust (NPS Trust) ya National Pension System (NPS) aser PFRDA ajanga melaba danga scheme kübok subscribers ajangzüksü asoshi rongsen aser senotsü anepalutsü atema Indian Trusts Act of 1882 agi melaba ama Pension Fund Regulatory and Development Authority (PFRDA) ajanga amenok.

GRADE	STREAM	NUMBER OF POSTS						OUT OF WHICH PwBD
		UR/GEN	OBC	SC	ST	EWS	TOTAL	
Grade D (Deputy General Manager)	Risk Management	1	-	-	-	-	1	-

2. Tsünglanglen shia aliba ama Officer Grade D (Deputy General Manager) shimtsü asoshi NPS Trust ajanga temsüa aliba Indian senso nungi application meshir :

3. Eligibility criteria, shimba yimya, application agütsütsü, fees agütsütsü aser iba mapa nung shimba yimya densema danga totuyuba tejangja NPS Trust indang website [www.npstrust.org.in](http://www.npstrust.org.in) nung angutsü.

4. Temsüa aliba candidate temi 07.10.2023 nungi 07.11.2023 nikongdang 6:00 ako tashinung apply asütsüla.

5. Iba nübu shimba maparen yanglushitsü/athitsü/agentsü tashi NPS Trust ket nung agüja lir. Iba vacancy notice dak sendakba nung temelenshi kar lira, ibaji NPS Trust indang website nung agütsütsü. Application agütsütsü asoshi 07.11.2023 nikongdang 6:00 ako ya tatembang asütsü.

Scan the QR code to visit <https://npstrust.org.in/>



General Manager

CBC 15112/12/0002/2324

OFFICE OF THE  
**MANGMETONG YIMPANG PONGENER  
KIDONG TELONGJEM KOHIMA  
KOHIMA : 797001, NAGALAND**

**TENÜNGSANG AGÜTSÜR**

Mr Chubameren Pongen & Mrs R. Awala Aier tena jabaso

- Er. Yimkumwati Pongen, Executive Engineer.
- Shri. Imlikokba Pongen, UBI.

Tena promotion ngua kidong nem tenüing tajung bener arutsüba atema tenüngsang agütsür.

Tsüngremi nena wadang maneni moajang ta sarasademtsür.

Sd/-  
President, MYPKTK

Sd/-  
General Secretary, MYPKTK

# Iran tsür Narges Mohammadi nem Nobel Peace Prize agütsür

**Stockholm, Mongputeni/Oct. 06 (Agencies):** Iranian activist Narges Mohammadi-iba Iran nung tetsürtem ajemreptsü merangba anema nokdakba mechi Hokulbarnü Nobel Peace Prize agütsü. Norwegian Nobel Committee chair Berit Reiss-Andersen-iba osang ya Stockholm nungi sangdong.

"Norwegian Nobel Committee ajanga 2023 Nobel Peace Prize sempet ya Narges Mohammadi nem agütsütsü lemtetogo, shibai Iran nung tetsürtem ajemrepba anema rarar aser ajak asoshi human rights aser nüchiso ajungkettsü asoshi nokdaker," ta Nobel Committee ajanga ashi.

"2023 Nobel Peace Prize sempet angula Narges Mohammadi-iba tasü ita tim atemba asoshi pa takum nung takoksa tulu ajuru," ta Nobel Committee ajanga ashi.

"Iranian regime ajanga la 13 ben apu, ponguben ken o balala nung aitsü aser küm 31 tepuokdak ayutsü temerenshi agütsü aser 154 ben azük. Mohammadi ya tang tashi tepuokdak lir," ta parnoki ashi.

"Iran nung alirtem asoshi ibai tajungba asütsü ta amanger. Yangji tensa kanga mejungi lir, yangji aliba activists tem takum samar. Tepela ya ulura. Narges tenüing nung ni kanga pelar," ta

Narges teti Hamidreza Mohammadi-iba ashi.

Mohammadi-iba Islamic Republic nung ken o tamajung tem asoshi nokdaka liasü. Lai clerical system anema nokdak aser hijab anema ola adok. La tepuokdak liaka maneni nokdak.

La ya Iran northwest tsütsü Zanzan nung 1972 küm aso. La college nung physics azüing aser engineer akum, saka kobi melie osangbener mapa dangi meyip.

La Center for Human Rights Defenders nung aden, koba 2003 küm Nobel Peace Prize angur Iranian lawyer Shirin Ebadi-iba tenteta liasü aser tasüba temerenshi agientsü asoshi rara.

Taoba küm Iran nung morality police kabo nung Mahsa Amini asüba sülen la maneni yimjak nung adok. "September 2022 nung Mahsa Jina Amini ya Iranian morality police ket nun glia asü aser iba ajanga Iran yimli anema political demonstration tenzü.

Longkak aiter temi shimba omen "Woman - Life - Freedom" ya Narges Mohammadi-iba inyakba aser mapa den kanga peta lir," ta Nobel Committee ajanga ashi.

Nobel Committee ajanga Iran sorkar dang pei nüburi ola adokba angatsü ajungshia aser democracy samar ta shia liasü.

## NSF Martyrs' Memorial Trophy: Liangmai FC semi-final tongogo



**Kohima, Mongputeni/Oct. 06 (TYO):** Angami Students' Union ajanga Indira Gandhi Stadium Kohima nung ayongzüka tang tesayadak 23rd NSF Martyrs' Memorial Trophy tanü asaya nung Liangmai Football Club semi-final tongogo.

Quarter final match tanabuba asaya tenzükdang End of an Era-i akoktsü ama liasü, saka goal 6-2 agi

Liangmai FC-i akok. Asaya tenzüker minute ana tsungta End of an Era nungi Nyithong (7)-i goal ka agütsü aser minute ti buba nung Liangmai FC nungi Kawijibo (17)-i kepzüka liasü.

Lamsanggin (27)-i minute 39 buba nung Liangmai asoshi goal ka agüja first half 2-1 nung tembang.

Mapang tatsüka anisüngzükbä sülen End of an Era-i kanga nüngdaka aliba

goal ka Chaba (30) ajanga minute 77 buba nung agütsü.

Ajisüaka Kawijibo-i ano goal ana agütsü aser Ningtingbo aser Kenumbi natia goal ka-ka agüja liasü.

Iba asaya nung Man of the Match sempet ya Wanamthiu Ringdi nem Ketholekho Kenna, Vice President KCCI ajanga amokja liasü.

**3rd QF for October 7:**  
United FC Piphema vs  
Asüfü FC @ 5PM

## Morocco-Spain-Portugal nung 2030 World Cup asayatsü

**Mongputeni/October 6 (Agencies):** International football body FIFA-i sangdong ka ajanga 2030 football World Cup ya Morocco, Portugal, aser Spain nung asayatsü aser iba asayamung küm 100 ajunga nüngdem nung mezüngbuba asaya asem Argentina, Paraguay, aser Uruguay nung asayatsü ta sangdongogo.

Iba telemetba agiba tetezü 2030 World Cup ya continent asem nung linük trok nung asayatsü.

"FIFA Council-i 2030 küm Morocco, Portugal, aser Spain nung iba asayamung ayongzüka asayatsü telemetba agiogo aser linük asem ya automatically qualify asütsü," ta FIFA-i ashi.

"Iba den bendenloksema FIFA World Cup mezüngbuba asayaba temulung dang yur FIFA Council-i linük yimtiba Montevideo nung centenary celebration ka ayongzüka agitsü aser Uruguay, Argentina aser Paraguay nung World Cup asaya kaka asayatsü telemetba agiogo," ta kasa sangdong ajanga metetdaksü.

Kasa mapang nung Saudi Arabia-ia 2034 FIFA World Cup atema bid asütsü tebilemba aliba sangdongogo, ta state news

agency SPA-i Bodhbarnü sangdong ka ajanga metetdaksü.

FIFA-i ashiba agi, Bodhbarnü telemetba agiba dak ajemdaker 2034 World Cup ya Asia aser Oceania linük ka nung ayongzüka agitsü aser 2026 WC ya Canada, Mexico aser United States nung asayatsü kong tang mezüngbuba team 48-i shilem agitsü.

Saudi Arabia dak alia Australia-i 2034 küm World Cup ayongzüka asayatsü atema bid asütsü imlar.

2010 küm South Africa nung WC ayongzüka asayaba sülen Africal linüktem rongnung Morocco ya WC ayongzüka asayaba tanabuba linük akümtsü. Argentina nung 1978 küm WC ayongzüko aser Spain nunga 1982 küm iba asayamung ayongzüka asayaogo.

Kasa mapang nung Morocco ama Portugal aser Paraguay na nunga tang mezüngbuba World Cup ayongzüka asayatsü, ajisüaka linük asemprongla nung continental championship tembo ayongzüka asayaogo.

Iba asayamung ya 2030 küm June aser July ita asayatsü kong asaya 104 asayaba angütsü.

## Taruba asaya nung Lewandowski masayatetsü akok



**Barcelona, Mongputeni/Oct. 06 (Agencies):** Champions League nung jenjang tajung ka nung ayuba sülen Spanish league dangi meyipa Deobarnü asaya nung Barcelona nungi asayar Robert Lewandowski malitsü akok.

Bodhbarnü Porto madak 1-0 agi takok anguba asaya first half nung Lewandowski ya tetsüng belepa liasü aser Granada nung league match masayatetsü. Spanish league football asaya nung Real Madrid temaba jenjang nung lir

asayatsü akok. aser Barcelona ya point ka agi tajemba lir.

B r e h o s t i b a r n ü Lewandowski tendanga liasü ta Barcelona-i ashi saka pa mapang kobika masayateti atatsü, ajibo mashi. Pa ya international break mapang Poland asayadak shilem magitettsü akok.

Tan season nung Lewandowski-i Barcelona asoshi ter ben asayaba nung goal trok aser assists pezü agüja lir.

Porto madak takok anguba

ajanga Champions League indang Group H nung Barcelona ya temaba jenjang nung lir.

"Tesüiba küm ishika tsungta junga masayatetba ajanga asenok meinpronga lira, tanü asenoki temenen kar samadaksüogo," ta coach Xavi-i Bodhbarnü asaya temer ashi, koba pa lenisüba kübok asaya 100 buba liasü.

Barcelona yagi Porto den kanga jungrabo masayatet saka takok angütsü lenmang ngutet.

Lewandowski ya asaya tenzüker minute 34 buba nung melen aser pa yiruba tali tejangjaba metettsü asoshi ano maneni tendangtsü imlar.

Second half tatemlen Lamine Yamal tepok angoba mechi melentsüsa akum aser defender Ronald Araujo tetsüng nung molatsü atua asaya tembang. Raphinha, Pedri aser Frenkie de Jong nung yirur tang tashi masayateter.

## Asian Games medal tally nung India jenjang 4 buba nung lir

**Beijing, Mongputeni/Oct. 06 (Agencies):** Asian Games tenzüker anogo 13 tashi asaya balala nung shilem agia arudang India nungeri medal anguba tsütsü 100 ajungtsü jenjang tongogo.

Hangzhou nung tang asayaba Asian Games nung tang India indang medal tally ya 95 lir, ajisüaka anogo 13 sülen India-i medal 102 bo junga angütsü aser ano anogo ishika anünga lir.

October 6 nü India nungeri saisapong balala nung medal ngua tang medal tally nung India jenjang pezü buba nung lir.

Day 13 nung India-i medal toku angu aser item nungi India nungur tebur hockey asayar temi final nung Japan madak 5-1 agi kokteta gold medal ka densema angu.

Tebur recurve archery team aser tebur bridge team nati Hokulbarnü silver medal ka-ka ngua liasü.

India-i bronze medal trok angu aser item rongnung tetsür Regu Sepaktakraw aser tetsür Recurve Archery Team ajanga ka-ka ngua liasü.

India nungur tebur kija badminton asaya rank tematiba nung alisang HS Prannoy-i semifinal nung tamakok anguba sülen bronze ka angu aser asem wrestling nungi ngua

liasü.

Temang tuozük seret 62 freestyle wrestling nung Sonam-i bronze ka, seret 76 category nung Kiran-ia ka aser Aman-ia 57 kg freestyle nung ka ngua liasü.

Tang tashinung India-i gold 22, silver 34 aser bronze 39 nguteta lir. India sülen anasatibaji Uzbekistan lir aser par ket nung gold 20, silver 18 aser bronze 26 lir.

Iba asayamung ayongba linük China ya medal tally nung tematiba jenjang nung lir aser parnoki tang tashinung gold 187, silver 104 aser bronze 62 nguteta lir.

Japan ya tanabuba jenjang nung gold 46 densema medal 165 ngur lir aser Republic of Korea ya tasembuba jenjang nung gold 36 densema medal 169 bener lir.

India ya archery nung medal asem, Kabaddi nung medal ana, Badminton nung medal ka aser cricket nunga medal ka angütsüsa.

October 7 aser 8 nunga India-i ano medal tali angütsü akok. India tsür hockey team ya broze atema Japan den asayatsü, chess nunga medal ana angütsü akok. Ano tanüngba wrestling events nungia India-i medal pezü angütsü akok.

## Ngwalwa yimdak scientific beekeeping... (Tapak 2 nungi...)

Iba training nung kidanger yimtsüngtem nungi ninang metsür 60 arua dena liasü aser yangji shisalen sayur ya Dr. M.K. Deka, Principal Scientist, Entomology, AAU, Jorhat, Assam; Dr. Pankaj Neog, Asso. Prof., Entomology, SAS, NU; Dr. Hijam Shila Devi, Asst. Prof., Entomology, SAS, NU aser Dr. Avinash Chauhan, Principal Investigator, AICRP

(HB&P), Entomology, SAS, NU nungertem liasü.

Dr. M K Deka-i aluyimba nung 'solitary bees' nüngdakba indang jembia, Dr. Pankaj Neog-i pollination indang onük nung jembia liasü.

Dr. Hijam Shila Devi-i 'Biology and seasonal management of honeybees' indang jembia aser Dr. Avinash Chauhan-i Meliponiculture aser

Apiculture indang jembia den melepzüng o jembia liasü.

Iba sentong nung kulizüng kaket agüja tembang aser practical sessions nung AICRP (HB&O), SAS, NU, Medziphema nungi Dr. Avinash Chauhan, Principal Investigator aser Ngukho Yalietsu, Bee Professional nati ninang metsütsü yimya balala sayua liasü.

**BILEMDANGANG**

"Na pela linüra dangar tenükshi."